

四庫全書

集部

欽定四庫全書

集部

草堂雅集卷八

詳校官中書臣丁崇祚

助教臣常循覆勘

總校官中書臣朱 鈐

校對官中書臣范 鏊

謄錄監生臣張若湘

欽定四庫全書

草堂雅集卷八

元 顧瑛 編

唐棣

字子華吳興人由茂才仕至吳江州知州尹休寧  
時有善政民為立生祠能繪事嘗畫嘉熙殿為上  
所知尤長於詩有集行於時

潮音渡

送客潮音渡飛花春又殘  
隔溪聞笑語倚權看峰巒  
落日漾晴彩東風生曉寒  
往來人似織應羨獨凭闌

寄題謝子翼晚翠亭

洞庭咫尺少經過  
嵐翠霏霏晚更多  
風作雨聲鳴墜葉  
雲垂秋影落滄波  
楓林賽社聞村鼓  
橘岸開船發棹歌  
欲泛空明三萬頃  
恨無題詠到陰何

城西閒居

久欲依山每恨遲  
居貧難辦買山貲  
貧收古畫人誰購

愛種名花手自移，近日看書愁散漫。  
經年晒藥補清羸，裁詩寄與諸朝士。  
還道如今老更痴。

古詩一首上復齋郎中

吳蠶繰出絲如銀，頭蓬面垢忘苦辛。  
苔溪矮桑絲更好，歲歲輸官供織造。  
不知何歲轉省輸，從此居民受煩惱。  
今年省官賢且明，省中庶務多變更。  
我公首為去茲弊，誰料寒谷春風生。  
民作歌詩感公惠，公心自與民情契。  
願言積德遺子孫，贊輔皇家千萬歲。

慈感寺

溪上前朝寺人間古道塲柳垂門外綠花發殿頭香雨  
榻晴猶濕風廊暑亦涼經僧旋繞處清磬散還長

丁復

字仲容天台人有盛名往年予訪虛一趙真士於  
白鶴觀時公在座間後數年君去世檜亭集始行  
然多所遺落今所輯錄皆補其缺其出處見檜亭

集中

山水圖

飛流怒觸青崖急，倒樹斜欹白漲深。  
峽日曉晴生雨氣，石林寒色起春陰。  
豈無百丈牽江上，應有孤猿惱客吟。  
行路人間盡艱澁，未應小米亦關心。

賦姚氏瑞竹軒

想見靈萌錦籜兼，露凝戢戢長雙尖。  
蒼擎漢使駢頭節，翠擁吳姬總角闕。  
迭和鳳聲風及檻，並回鸞影月當簷。  
何因未客勞前席，相對此君長捲簾。

送余遵道之當塗學錄魚東巖教授父子李伯羽

昆仲

楊公晚歲多高弟余郎妙年初試官爛熟厭聞渠手熟  
瘦生從笑此肩寒開窓白鳥當書几把箸青山落飯盤  
監郡長侯賢特地下階相接愛儒冠

嚴家父子賢橋梓李氏弟兄芳桂枝大白甕來須強酒  
小青衣至又傳詩庭槐夾道寒垂角泮水橫橋冷見眉  
頗怪東頭近州縣教成何日罷榜笞



送一宗上人覲師秋浦因懷舊游奉悼印江宗公

兼柬李瞻仁卿子和三徵士

江色遙連池口山潮痕新上石頭灣阿師捧唱機鋒疾  
令子棹歌心宇閒春歸芳草落花外月出白猿青樹間  
水車嶺頭一相憶龍河寺裏幾時還

二年秋浦將諸友兩寺春林喜醉回抵掌笑談空記憶  
上頭尊宿已凋推奔流歲月尋常去倒上江潮日夜來  
好與長歌白石爛平天水色一銜杯

送璟上人之武昌就道入京

弔古且過鸚鵡洲  
觀光還到鳳凰樓  
乾坤百歲易遲暮  
風雨幾時今蚤秋  
南國每逢天際雁  
北溟不化水中鷗  
黃金軟貼伽黎色  
却愧蘇卿尚敝裘

和唐長孺致仕歸

黃山三十六嵯峨  
江上相逢碧玉珂  
社稷終淹長孺直  
文章每患士衡多  
教官不足先生飯  
詞客曾論織女梭  
石田茅屋歸來好  
安車蒲輪奈爾何

蜀山寺江月樓

高僧愛居江月樓  
霜飛木落蜀山秋  
天空直與江無底  
月出獨登樓上頭  
烏鵲自驚迷島樹  
魚龍不動失沙鷗  
江流東去日西落  
白髮未知人世愁

送慈上人游金陵

吾鄉名彥俱見之  
吳門留滯未云遲  
杯前落日當人沒  
笑底春雲為客披  
一錫先期成獨往  
六朝遺跡許同嬉  
却為蕭寺斗酒飲  
浩歌須君詩句奇

書唐仲實寄題紫陽山興道觀詩後

萬仞花屏天下奇三十六峰遮參差仙人騎鶴夜度嶺  
客子問龍秋上池屋根一一十洲樹丹顆明明五色芝  
何年却送唐君去細和山中所賦詩

賦得雨花臺送勝上人歸吳

雲公高坐講貝葉天女虛空散寶花綠草漫生新雨後  
青臺獨上夕陽斜眼中歷歷六朝樹海上翩翩五月槎  
雪色鱸魚生作鱠朱涇船子釣綸車

題飛霞樓

仙客離居帝子家朝朝樓上看飛霞  
九華山頂留鳧舄  
五色雲中接鳳車  
几上珠光紅似日  
庭前桃子大如瓜  
持杯更有憑高興  
直道銀河泛海槎

寄題湛碧軒

伯生書

古道南昌湛碧軒  
名方西國給孤園  
靜臨無地天垂蓋  
虛動承塵月湧盆  
雪氣薰浮寒竹繞  
秋聲微動夕花翻  
青城樵者遺題墨  
紫禁通宵幾夢魂

五日登賞心亭

秦淮之水繞郡流誰家後園紅石榴人間五日不作飲  
天上浮雲空自愁白髮尊壘將稚子畫闌珠翠賞龍舟  
回頭楊柳生新月騎馬朱顏擁從騶

送御史自湖廣按部還遷內臺

驄馬巡行楚子國詔書遠召江南還要令耳目在左右  
用廣視聽銷回姦鷗鶚橫空霜翮勁鯨鯢落波海水閒  
玉帛繽紛朝萬國却從東封祀秦山

壽寧寺送僧歸永嘉

清涼脫衆東甌去乍暖興孤南路賒  
總謂龍河新作寺終憐雁宕舊為家  
石<sub>闕</sub>或問菩提樹海國爭看優鉢花  
更道本來無所住尚看鳴錫帶飛霞

懷虞伯生

奎章學士虞夫子老向山中卧白雲  
祇為盛時成瑞物鳳皇鸞鵠自成羣

懷李仲公

閔子十年居白下仲公文字數相看信州河下扁舟泊  
風雨蕭蕭獨夢寒

懷祝蕃遠

白衣寺裏一尊酒語坐古藤將葛彞饒州博士應相憶  
獨上春山采紫芝

懷危太樸

十五年前危處士秦淮江上忽相逢眼中一一驚奇見  
如上崑崙羣玉峰



懷汪伯羽

桂楹榭楠未盡識草草何堪別長公喜是鳳簫吹月下  
高秋日日願東風

題錢舜舉畫雞

花前爭雄兩角勇花後伏雌孤哺雛忘身縱欲作花伍  
塞耳不聽時大夫

孟氏山菴和劉堯佐韻

綠映春林如積苔山翁仙去客能來松根斜日停杯看

無數幽蘭花自開

題謫仙觀瀑布圖為方遠賦

三生異精爽千載獨情親  
已愛匡廬境更愛匡廬人  
謫仙騎鯨不可返香爐瀑布長在眼  
上人字遠非偶然前身自是東林遠  
往年挂席下小姑陶公社路埋春燕  
定中時復一歸去石上夜發雙芙蓉  
却訪天門捫絕壁仙燈點點厓  
孤碧竦身健陟日尋覓舉頭近將天  
咫尺銀河倒挂三石梁錦袍宛在五  
老旁清風緬邈九江秀遠

席依稀七寶牀，即欲攬之忽不見。飄然散作秋雲片，笑向吳興唐子華。為寫水墨裁東絹。

和鄭復初書懷

促促夸父杖，汲汲祖生鞭。無繩能繫日，有酒可忘天。身後長千載，生涯近百年。時題醉中語，翻解得稱憐。此生非獨得，與世偶相依。睡帶晨烟起，行將落日歸。未能超有跡，漸欲到無機。矯首終遐漢，天高黃鵠飛。

送戈伯敬歸臨川

江上魚旬雨中六月秋澄潭周室下飛瀑出巖流雪  
氣生蘿僻陰輝動竹幽隔年懸寄幙此日上歸舟昌運  
難忘仕名邦自足游三神清颯爽六帝久淹留著述恢  
前史編題發大猷揮毫驚冠豸下馬按行騶秋剡烏臺  
上晨光白壁投先傳廣陵肆不待集賢讎郭相名初重  
王公禮更優虞翁深獎予吳子早趨樞道在珠淵媚譚  
數璽軸抽殷周起釣築廊廟賴謨謀自謂才須用寧知  
命尚仇向來聞亞聖傳食且諸侯宣惠庸非擬勛華信

所侔只今同海宇不敢固林丘燕賺曾論馬齊歌或飯  
牛彼遺從彼耳吾出豈吾不喜色毛生櫟驚心季子裘  
家尊臨饌憶庭稚掩書愁親戚來還廣朋儕過問稠作  
花燈陸續鳴樹鵲綢繆行省新官好清朝哲士收大廷  
陳寶器奇產尚琳球上壽登觴俎循常進瀆滄徵書應  
自及東帛况加修抱甕聊茲老持杯寫我憂王門裾已  
短那得效枚鄒

寄朱以寧奏差

生世若萍梗憶別悟斯言蘭舟乘趙女晴湖看文鴛作  
賦比黃祖下榻識陳蕃與子各試吏間隔邈攀援旅食  
更朝暮簿書厭啾喧念彼廊廟器為國秉要論玉堂事  
明主聲名照乾坤屈伸固有待與若魯璆璠志士當守  
素抱德良自尊春風媚桃李松柏常高竇

夏日過龍翔寺養蒙室問琦元璞書記因讀鄭明  
德詩就韻奉贈

新竹滿牆雨西鄰留老翁上人虎丘虎作客龍河龍及

室每愛玉樹好住屋少隔銀杏東日不得見夜作夢時  
一過之但恐空百年共秋草兩間同轉蓬昨日之日我  
髮亦已白明日之日子顏寧復紅衆皆上我固下宋石  
盧胡誰售價花緣梅苦煖為冬葉為松高寒入夏南風  
西來即是秋商歌且爾鏘鳴球一蝸舉世兩鬪國六鼇  
何處三山洲須君界發白毫相放我江湖之客舟我年  
五十久知命我自信之誰與證君今語我我即聞我且  
語君君乃聽儼屋得園一畝耕煮菜作羹全無成何如

寘戚叩牛角長歌夜夜迨天明

李五峰題此詩云初讀新竹滿牆雨意謂類馮  
海粟及讀至一蝸舉世兩鬪國六鼇何處三山  
洲大以為好

奉餞玉淵上人之湘南

湘之山兮蒼梧九疑在其南君山當洞庭少平兩峰上  
向周遭六十里而乃遠與之相參他山霹靂感神物異  
朶菑苞開優曇阿大中郎道吾住滿院蒼竹秋蕭慘猶



子上人別我去故山紫芝春鬱藍置酒送之與衆醪贈  
言有以豈我絨匡廬有峰未讓嶽彭蠡之澤何如潭佛  
樓行將五鳳入僧省趣至兩馬驂常家太守新作寺廣

闕

衲子禪為龕開堂即當龍象集說法亦遣蛟鼉語固

知近郭殿閣遠政以在水波濤涵夜宿尋汀下鳴鶴晝  
先入棟搖如蠶何當多寶分半塔永聽屑玉霏清談道  
氣迎人昔蘊藉林霏送客朝櫻糝熊繹渚梁同楚國虎  
關失守歎嶠岵訖今諸孫散吳越猶以喬木知纓簪仲

南觀母良亦好玉淵奉師尤所堪晨聲走覓鐸繞殿夕  
影出送經寘函推門數數吃茶去寫詩往往待酒酣老  
草也復譽新好饌蔬每即充饒貪杜陵可以即枕簟揚  
雄泊如忘石甌豈不記祭酒歸來有高致作詩送淵因  
寄及當時自謂蒼厓翠壁之石或者為我鏡師今之行  
實是歸之人其聞之亦將馳夢於春山香靄之蒼嵐政  
如天台老客失二子青萊可摘赤脚可使有酒且滑無  
酒且醑舉杯在手念之到口不能銜天闕劃開雷府疾

雞肋不足虎口饒  
凌霄更上亦安穩  
抱甕竟老吾無慚  
送鄭蒙泉入茅山

三君各上鶴背去  
三峰即同鼇背還  
遂此天家開洞府  
至今仙島在人間  
玄靈夜直趨虎出  
白氣晝擁許龍閒  
清秋坐嘯向高頂  
處處稻田雲遶山

瀛海仙翁有令子  
遠訪茅家三弟兄  
霞氣遶庭先作夢  
佩聲行道或來迎  
丹飛木末龍頷吐  
霧下松根虎魄成  
今年江上有狂客  
共擢酒船歸四明

項炯

字可立天台臨海人端行積學為時名儒嘗居吳中甫里書院獲相與從游惜其詩不多得云

宿鳳皇山上方懷古

夜豁山窓坐沈寥一尊月下酌江濤縱橫龍尾霜痕斷  
彷彿虎牙雲氣高誰云魂魄猶思沛細看荃蘅忍反騷  
百五十年真夢爾古槐殘蟻黑於毛

石壁削下三千尺挂我雙屐栖林廬潮聲夜半起天末

月色秋高照雨餘  
禪榻了無羅綺夢  
酒家或見鳳鸞書  
塔根蘚骨化黃土  
寧使人間瘧鬼除

江左夷吾浪得名  
豫州英槩亦沉冥  
夕陽遠樹山如赭  
秋雨荒臺草更青  
漢苑玉魚誰復葬  
昭陵石馬已無靈  
可憐白髮商人婦  
猶向鐙前話後庭

楚聲四起國殤悲  
運盡東南事可知  
塞下徑推金馬去  
草間俄見石鯨隳  
祝宗端合先祈死  
丞相空聞後出師  
落日半江秋寂寞  
乳鴉啼繞萬年枝

即事

江南水濶疑無地  
漢北風高忽似秋  
鴻雁定應驚悄悄  
麒麟何許泣幽幽  
步兵阮籍唯耽酒  
隱士龐公不入州  
敢廢朝盤堆首宿  
封侯渾是爛羊頭

送袁孟敏歸潭

吳門送客折楊柳  
迢遞郵亭短復長  
五月海雲應未熟  
孤舟江雨定微涼  
春濃乳酒浮鸕鶿  
夜冷牙床攬鸕鶿  
歸到故園無限樂  
小山招隱莫須忙

次韻鄧祭酒贈極元禪師

塵尾天花洒石扉莫教五色掩摩尼峰頭笑縱金衣鶴  
竹裏閒尋玉版師言論每懷龍井夜扶攜渾似虎溪時  
芝雲更擬分蒲榻黃葉滿山題近詩

題趙子固水仙

龍波乍起湘雲濕帝子欲歸歸不得十二煙鬟點遙碧  
到今愁魄寄湘花畫出深愁雲繞筆

題趙子固蘭菊

涼雲如波散銀浦飛虹不見行天鼓野花幽草一團春  
暖天相倚愁殺人

空井辭

石闌古蘚青連錢老梧石罅孤根懸下有一斗琉璃泉  
輓轡不鳴修綆斷蛛網濛濛梧葉乾

江南弄

篁深雨過月色青濕螢幾點風穿櫺秋聲滿江龍一吟  
江空漠漠懸疎星鳳皇城頭石花吐雷擊老樹蛇骨腥



鬼雄騎鼇潮際上  
暗藤如山走漆燈

吳宮怨

繡楣洒黃粉椒壁張紅青  
倚簷樹如鬼深草蛇夜鳴  
髑已無淚古恨埋石扃

公莫舞

龍蟠錦帳金奕奕虎旗無際人馬立  
肉林垂益陵阜赤  
萬甕行酒晴虹濕大蛇中斷狂魄滅  
重瞳無光射寶玦  
雷憤風愁三尺鐵河山未必如瓜裂  
老荒辟咄語公莫

頭上青天懸日月

妾安所居

北風玉燕落雲際  
曲屏夜渺紅冰碎  
守宮不滅腕痕香  
蕙帳垂垂雙錦帶  
杜鵑聲裏發珠林  
黃葉夢中行紫塞  
防秋舊校馬如狗  
繡鹿毳袍新樣製  
芳魂一點渺何棲  
烟雨菰蒲大江外

感秋六首

南風久不作  
囂侵曠中天  
龍文裹羸犗  
熊羆散如烟  
萬

蟻赴墜蝶掠于下瀧船誰當昭若蒙凍雨洒枯蓮

劉項龍虎爭遺民盡瘡痍故掾入收律諸將醉斫柱四  
老亦強出兩生終不起三王盛禮樂竟為呂政燬烏乎  
百代下汲汲豈無意

洛陽少年人英風振四方三表與五餌可以給中行胡  
為慟歲餘不一試而亡曾顏雖魯愚豈曰終荒唐天才  
何代無養之當有方

班超負奇氣投筆西出關風塵髀肉消日月鬚毛斑苟

可利吾國何必求生還偉哉馬伏波竟死壺頭山

雲雨手翻覆越盟久已寒尺布與斗粟意態尤可憐狂  
奴豹隱霧故人龍在天鶴書訪羊裘賤貴何足言

今年深入山逝將同木石時讀古人書撫髀成感激顏  
生雖陋巷易地亦禹稷彬彬韶冕冕損益文與質杜陵  
安知此妄語同盜跖哀哉疇我晤長林月如漆

高明

字則誠永嘉平陽人至正五年張士堅榜中第授

處州錄事長才碩學為時名流往來予草堂具雞黍  
談笑貞素相與澹如也

題孟宗振惠麓小隱

宗振孟  
后之裔

汴水東邊楊柳花春風散入五侯家繁華一去江南遠  
閒汲山泉自煮茶

題支離叟

錢唐門裏支離叟短髮蕭疎色顰垢雪霜歲晚結輪囷  
風雨年深增老醜挫箴治解總無能欲與冥靈齊上壽

天公怒此怪且嬾勅遣靈官下搜取勾婁吉利忽飛來  
虎倒龍顛盡灰朽女蘿飄騰白鶴去琥珀迸裂青羊走  
繁陰已逐謝仙車枯榦徒存韋偃手邇來好事猶痛惜  
歎息形模無復有寧知百年皆夢幻靜看萬變互紛揉  
榮枯相尋無已時成壞有數元非偶南山誰信梓化特  
崑侖俄驚柳生肘朝菌何曾閱晦朔槿樸那知避薪樵  
全軀孰似櫟社樹絮之百圍今在否人生根蒂不可牢  
况為草木計近久野客空歎倚江柎老奴謾泣琅琊柳

寒烟落日西湖邊，衰草荒廬園數畝，不見當時錢門限。  
春蚓秋蛇徒蚴蟻，玄雲飛盡墨池空，直寄亭前誰酌酒。

送蘇參政

日月垂光照海濱，東南聲教屬儒臣。九天雨露金甌重，  
萬里山河玉燭新。田野年豐多貢賦，江湖秋靜息風塵。  
此行宣室須前席，賸有嘉謨為上陳。

上苑東風珂珮鳴，宮鶯初啣隔花聲。天清北口烟塵淨，  
雲去西山雨雪晴。畿甸居民瞻奉使，衣冠國子拜先生。

漢家張趙何須數待看臯夔致太平

天上神仙白玉京  
烟花繚繞鳳皇城  
端門日上紅雲動  
太液春寒綠水生  
封事曉當香案奏  
奎星夜接泰階明  
更看鼎鼎功成後  
綠野堂深遂素情

趙渙

字季文

闕

人由憲掾陞湖州從事端謹廉方人

見其儀表莫不興起從政之暇放情詩畫皆為時  
所重然不苟得也



暇日同仲穆諸公游道場山和東坡韻

道場山深美林麓坡老文章照巖谷簿書休暇得良朋  
載酒幽尋歡意足朝寒嵐重陰漫漫石頭路滑青屈盤  
仰瞻孤塔倚高漢俯聽絕壑鳴飛湍老僧愛客煮茗出  
暫與閒雲分半席自言住山八十年夾道長松手親植  
宗人好事攜歌鬢為予嘯傲泉石間壺觴到處即傾倒  
何必西湖與東山郡圃花開少晴旦屈指春光已過半  
百年行樂能幾何爛醉芳時莫長歎

病後過道場山漫成

愛此道場泉石好公餘每到即欣然兩山空翠疑無地  
一塔高寒別有天未暇耕雲深隱遯何妨煮雨小留連  
賞音最重東坡老爛漫雄章萬古傳

連日南山風共雨染深溪色綠依依官閒自喜詩添藁  
病起誰憐帶減圍栢府無才名漫在草堂有約夢頻歸  
足艱未快登臨興空羨雲間鴻鵠飛

宋沂

字子與清江人由成均諸生擢藝文監掾遷贛州  
從事復除常山縣尹與子會于白鶴觀出示春詠  
亭藁因錄數詩用刊于左

題燕士李叔成靜怡精舍

叔成故淮安  
郡侯子也

守道豈忘世脉脉重端居曠懷不可極清風生太虛寂  
寂獨無營欣欣常有餘童子啓窓戶晝讀孔氏書窅然  
在隘巷時來長者車問我何栖遲東陵未丘墟矧伊幽  
州士何為卧空廬荅云各有志素絲尚匪汙相從賦黃

鳥駕言歌白駒鳳兮或來下愧彼狂接輿

題澹齋

泠泠山下泉謾謾松上風松風吹我心置彼山泉中清  
深聊洗耳汪洋因盪胸時時酌玄酒孰與甘醴同張侯  
坐齋閣尺宅如虛空泊然濯塵慮明德庶彌崇

題聽秋軒

惻惻夫何如幽齋致虛極相看數竿竹更覺萬籟寂顯  
景逾清曠天宇彌寥泬涼颼發金奏繁露溥玉滴高梧

庭鶴唳衰蕙候蟲唧願言凝耳韻端居以游息

送趙御史仲禮之任南臺併東蕙善達公經歷元  
載王公用道孔公二御史

天子龍沙拜法官議郎新戴辟邪冠曉辭漠北水霜重  
秋到江南草樹寒諫疏頻煩明主聽題詩長共故人看  
應憐閭里誅求急尚布朝廷禮意寬幕下風清鳴一鷄  
臺端雪霽見雙鸞寥寥渡海三冬暍煜煜凌空五色翰  
晉代新亭蒼蘚合梁朝舊寺土花殘石城慷慨悲袁粲

別墅風流憶謝安千里憑高麾繡斧幾回攬轡並銀鞍  
諍臣事業須公等努力明時匪素餐

奉餞御史中丞汪公大司徒致仕歸隴右

仗引絳駟中執法鏡懸清鑒大司徒當今天子尊元老  
自昔諸侯祖二疏臘盡掛冠辭北闕春來供帳出東都  
魏舒就第施行馬薛廣傳家保賜車德教萬民蒙帝賚  
王封四世贊皇圖翰蕃方國歌周雅帶礪河山著漢書  
燕塞驂騑知故道隴雲鸚鵡識前驅平泉草木芳華裏

終日垂紳擁玉魚

東海謠奉送宋太監降香海上天妃廟

東海鯉魚搖赤尾舳艫盡發江南米帆檣出沒蛟鼉窟  
靈雨神風勞帝子紫衣使者麾金幢麒麟煖玉隱天香  
元君晝下翠旗濕百靈冉冉天吳立使君騎馬歷東吳  
吳中父老爭迎趨自言春濤漂白骨官家下詔復征役  
今年隴畝杭稻空縣官索租到疲癯丁男登山拾橡栗  
妻孥含酸向人泣使君北來候神人應憐赤子百憂集

明年海若不揚波君歸宣室當如何

送遜都水赴海運萬戶

都水使者日邊來黃金虎符照漕臺笑持英蕩入滄海  
不比徐福求蓬萊將軍昔騎青驄馬風采桓桓丹闕下  
紫髯如戟半成霜議論精神更瀟灑今年運米發東吳  
三百萬石皆明珠揚旗列戟耀雲漢伐鼓鳴金轉舳舻  
將軍尚文今尚武何物鯨鯢敢予侮櫓槍蕩滅凋瘵平  
報政歸來奏明主



贈別黃德廣赴都

江上相逢渾未久，忽對芳尊傾別酒。  
君向燕臺萬里餘，我留吳會三春後。  
當年曾入承明廬，千官委佩侍金輿。  
此行剝擬長楊賦，何用頻封光範書。

白鶴觀次韻鄭蒙泉呈朱仲文陳庶子

誰寫黃庭一兩章，碧桃花發日初長。  
欲求大藥黃金鼎，先解明珠白玉璫。  
漠漠春陰連海氣，遲遲雲影度天光。  
羣公共愛幽栖好，芝草瑤花禱衆芳。

次韻答蘇昌齡

二十四橋春雨晴高齋日日讀書聲寄來滿紙闕濕

想見吹簫弄月明傾蓋清尊相為醉盃簪白髮可憐生  
東風三月淮陰郡寫寄綢繆故舊情

寄馬易之

近日淮南見馬卿新詩句句掇瓊英畫船不肯留三日  
先載東風過四明

自是風流愛鑑湖木蘭舟上倒金壺鱸魚蓴菜戀鄉國

馬潼蒲萄憶帝都

草堂雅集卷八

欽定四庫全書

草堂雅集卷九

元 顧瑛 編

郭翼

字熙仲姑蘇之崑山人明敏博學不屑為舉業專志為古文詩尤精悍縉紳先生無不愛重之人言婁東之能詩者必曰東郭生云

題張戡畫瘦馬圖

瘦骨鋒稜珠汗落卧痕半裸古苔烟未脫將軍金匱匣  
又馱兒女玉嬋娟倉皇日色龍沙外慘淡秋聲雁塞前  
神駿只今誰貌得開圖老眼一醒然

宴婁東園分得五字韻

迢迢望瀛洲流雲下東渚笛教仙人借酒使文君取簪  
營寫林綠茵茵發江雨煌煌金閨姿天動星文聚華辭  
播蘭茝繁價登瑠瑤龍鏐秋濤淨鳳羽雲色五燕遨亦  
云暢驩集那得屢驕驄踟晚轡閣門涼月舉

寄鄭九成懷鐵厓且聞有挾璫花赴倪雲林之約  
府中從事近將書只道清狂事事無雪艇下來要陸倩  
雲林直去看倪迂醉時自舞鐵如意愁裏休歌玉唾壺  
揚子草堂頻有約速來滿擬為君酤

江水辭二章

江水一百里送君君去時丁寧桃葉渡莫唱渡江辭  
江水一百里江流七十盤初三弦上月相憶照寧環

題宋高宗便面

康邨龍飛日中原不可支乘輿猶北狩淚濕畫中詩

與野航汎舟綽山懷玉山

綽山樹色青如薺蕩裏張帆曉鏡開烏目峰高雲北下  
白沙湖濶水西來菰蔣打雨鳴還止鷓鴣迎船舞却回  
好入闕

畫祇慚揚馬是仙才

樂府十六篇

江南曲

江南暄新花月天美人盤游緩愁年翠鬢姣春扶上船



扶上船月如水霞蓋車度花裏

游女曲

麝衣寶珞花氤氳芙蓉小釵金鷲裙流目艷艷思若雲  
思若雲可憐嬌玉條脫金步搖

采蓮曲

青溪小姑雙嬋娟蓬蓬荷葉金槳船含情戲采並日蓮  
並日蓮為郎喜刺滿莖傷玉指

采菱曲

湖灣小婦歌采菱盪舟曲曲花相迎  
花開鏡裏搖明星  
搖明星妬華月郎不歸怨花發

陽春曲

柳色青堪把櫻花雪未乾  
宮中裁白紵猶怯剪刀寒

鳳臺曲

聞道嬴家女吹簫入紫雲  
如何鳳臺上不棲祖龍君

淮南王曲

漢武好神仙淮南去不還  
徒令風雨客感淚茂陵肝

獨漉篇

求祿求祿清白不濁清白尚可貪汙殺我明明日月麗  
乎太清明君當宁明臣在廷賞不虛功刑必當罰孰將  
溷溷我寧察察濯乎不汙皦乎不緇莫夜之金弗替於  
懷幸甚至哉歌以言志

自君之出矣

自君之出矣花開又花謝思君如日月耿耿晝復夜  
自君之出矣徒守零落耳思君如車輪輾轉愁不已

自君之出矣琴瑟何曾御思君如落葉蕭瑟悲秋暮

明鏡篇

開鏡珠璣匣盤龍百鍊金使君持照妾不解照君心

采蓮曲

蓮子復蓮子苦心郎不嘗為郎剝蓮子蓮子憶空房

汴隄樂

已信隄名汴誰教柳姓楊龍舟行樂地不得復歸唐

王孫曲

春來百種草無那怨王孫迷却郎歸路萋萋不斷根

夜夜曲

蕙花空帳不生春香壁泥紅墮網塵微步姍姍燈影裏  
金屏夜降李夫人

題柯敬仲梅花竹石圖

夜寒起坐看龍影金閣果愚小殿東夢覺香吹梅子樹  
玉文堂上月方中

題李遵道小寒林圖寫廉夫詩後

溪泉溪樹滿春青  
寫入桃源翡翠屏  
揚子風流那可得  
為渠安箇鐵厓亭

行路難十二首

贈君蒲萄之芳醇  
瑤瑰玉珮之鏘鳴  
昆吾鹿盧之寶劍  
空桑龍門之瑟瑟  
紅顏暉暉不長盛  
流光欺人忽西沈  
願君和樂兮欣欣  
聽我長歌行路吟  
不見陸機華亭上  
寥寥鶴唳詎可聞  
朝愁不能驅暮愁  
不可處中區何陘  
隘乘雲汗漫瑤之圃  
爰從王母訪井公  
復約元君謁東

父靈桃花開銀露臺玉文棗熟青琳宇我願於焉此中  
息錫以遐年永終吉

君不見草木榮復凋青青推折風霜朝人生寓一世何  
異石火飛流焱貴賤壽夭百千殊死者前後孰可逃當  
年稱意即可樂烹羊烹魚羔名同僚莫令閒慮損汝神未  
老面黧毛髮焦岡頭松柏多高墳聲譽俱隨塵壞消令  
人及此志沈苑上堂鼓瑟歌詩謠

門前十字街車輪馬脚不可遮馳名逐勢死不畏赤手

生拔鯨魚牙得之未足為身榮敗者顛倒紛若麻嗟予  
無能守命分樂取意適不願奢諸君惘惘胡不思來日  
苦少去日多丈夫闔棺事始定何用無益長怨嗟

秦女卷衣咸陽宮蘭烟桂霰茱萸芳泥金爛爛輝五采  
新衣新賜蘇合房朝擁羣仙行羲和御車駕飛龍莫從  
天女游月中吹笙鳳鳴空君恩恐移今已衰羞將淚滴  
紅芙蓉寧作蓬池並翼鳥飛飛到死匹雙雙

離離西園草翩翩蝴蝶飛憶昔與君婚媾時年華容色



兩相宜死生謂我不棄置中心不合勢必離還君金鑄  
畫搔頭不忍與人結相思

今日復明日年年月月從此積一年三百又六旬強半  
夜消五十刻予年四十貧不仕戚戚何日展顏色看花  
抑鬱與誰語對酒彷徨不能喫諷誦書詩百家言脣腐  
舌禿齒龕碗眼中靡曼盡年少醜然面目予不識不知  
主之何者神彼此薄厚胡不均人言人有願願至天必  
成兒子長大力田穡有酒樂我平生心

感感靡所騁出自城北門顧瞻荒丘中鬱鬱蹲石麟石  
闕字漫漫不知何代貴者墳形骸已滅魑魅跡物化盡  
為狐兔塵吁嗟漢家陵闕荒無主青山落日秦川下猶  
聞樛里有智人天子之宮夾其墓今日休論智與愚昔  
人意氣復何如願借飄飄丹鳳舄與子鍊形入雲墟

庭前芳樹花參差歲歲爭新滿舊枝開白開紅接芳葉  
撩亂二月三月時昔日美人顏似花看花暮去朝復來  
紅袂羅襦炫香露青天白日春風吹而今零落少顏色

見花惋惋含悲思百年何人得長好歎息謂君君不知  
長安豪俠無所憂紅雲百尺起高樓簾櫳玳象織為席  
麗服綺食擬王侯黃金買妾弄嬌彈銀鞍走馬逐貴游  
不知仁義何辨為孔墨不知事業何重為伊周他人叩  
之無一言魄然坐待歲月適天意茫茫胡可道夷叔餓  
死顏回天君不見落葉辭故枝南東北西從風吹君不  
見薤露何易晞人死一去無還期君於此時坐憂老不  
知日月疾若馳富貴在天即在我爭者招尤速其禍且

從陳遵投轄飲適喚王戎如意舞以茲日夕意歡樂昔  
人愛酒苦不足達生委命皆有然君獨胡為自拘束  
君不見信陵君仁而下士有名聲步從毛薛游盡禮于  
侯嬴食客無慮三千人何況大國一个臣東閣虛席生  
埃塵縱使蘇秦生乎太平世閉口結舌難列陳

陌頭采桑悲好春秋風落葉愁殺人豈獨推移感時序  
念君客游恒苦辛鴻雁秋高斷邊色蟪蛄露寒流網塵  
豈無膏沐可為容愛而不見心孔瘕憂來不覺沾裳衣

援琴未鳴聲已悲怨妾斃斃而獨處羞見合歡雙鳥栖  
君不見流水泯泯去不還日月逐逐曾無閒人生長恐  
死催促富貴早來開我顏飲酒飲不多直愛美人揚美  
歌只今愛樂亦已晚過眼百年能幾何

題倪元鎮畫雲林圖

鬱鬱倦時燠雲漢雨如洗美人既云邁胡寧不忻喜微  
烟隴夕樹鮮月度秋水人生豈無適所適當在爾

蹋踰篇和鐵厓韻四首

簇花小銀雲作團雙尖繡襪星流丸金蟬束腰燕盤盤  
燕盤盤綵門下第一名齊雲社

倡園小奴花箇箇踟朝朝花裏過釵墜蜻蜓髻倭墮  
髻倭墮玉瓏璫嬌倚樹雙臉紅

綠雲草色光如苔綵樓紅扇相當開美人凌波蹴月來  
蹴月來不墮地袖回風動羅袂

花落水流春滿路走紅踟躕羅塵步繡襦鴛鴦暖香霧  
暖香霧酒光獐紅映肉太嬌生

和李長吉馬詩廿三首

駮驥連錢動金鞍，鏤玉羈無人。尋穆滿借與，閭風騎  
肉礪錦纏鬃。流雲汗似紅，太平無戰伐。駮驪走沙蓬，  
龍性非凡質。騰波出紫雲，檀溪飛過日。應識漢將軍，  
繡霞橫虎脊。珠汗抹龍章，落日青葱嶺。霜高草色黃，  
龍印留官字。霜花剝暗毛，長鳴愁顧影。祇憶九方臯，  
霞目鏤金鞍。霜蹄削玉寒，曉看經邏些。暮已薦樓蘭，  
瘦骨如山立。臨流飲渴虹，誰憐中道棄。苜蓿老秋風。

出河水在鬣昂首動驚飈伯樂不再活誰復振金鑣  
神駿知無匹驍騰絕域來流沙一丈雪夜拂白龍堆  
天子飛黃馬牽來賜近臣玉堦新雨過風滾落花塵  
內殿玉花驄斑斑散肉駿奚官新浴罷沙苑踏春風  
佛郎通上國萬里進龍媒曉日開閭闔虹光射玉臺  
天馬誰能馭和鸞駕紫微年年清暑去霹靂逐龍飛  
大奴司虎苑驃騎牧龍廷不擬歌秦馭重看賦魯駟  
騾牝三千匹雲屯十二閑六飛當御駕喜色見龍顏



霧漲蒼龍鬣風鳴紫玉珂駿羣空冀北天象動滎河

路

闕

超雲影拳毛散玉花相將馳鳳苑寧復困鹽車

玄宗愛舞馬錦色看如雲離宮三十六樂動半天聞

赤驃何神駿應憐識者稀賢材生並世騰踏看追飛

莫言淹皂棧也會躡祥麟逐電疑無影如龍自有神

煌煌金絡腦裊裊紫游韉看花不畏晚相逐過橫塘

秦皇七匹馬追風箇箇輕不聞東海北采藥上蓬瀛

驥子大宛種房星夜降精漢家求不得兵壓貳師城

題仙山樓觀圖

五雲樓閣世間無  
日月龍光出綺疏  
王母衆中金羽蓋  
雙成扶下紫雲輿

題美人圖

上清宮殿五雲車  
降下仙人萼綠華  
怪得雪衣無箇信  
只將條脫寄羊家

題詩意圖

鬱金堂上春濃否  
薄薄羅襦杏子紅  
白日繡牕鸚不語

都緣詩思落花中

題倪元鎮畫

不見草堂檜樹西  
早來雲氣忽相迷  
野老回船怕風雨  
竹雞柵裏莫教啼

題秋山圖

山上浮雲天幾重  
秋高華散玉芙蓉  
好攜謝朓驚人語  
醉裏來登落雁峰

絕句

沙洲蘆葦如城郭水深門前百丈洪老漁晒網卧日裏  
稚子捉船行水中

楊柳蓋江花蓋屋就中二月覺春多一雙白鵝浮新舫  
窄迹紅雲踏艷歌

高桃花發江林裏蝶弄鸚銜四散飛便開金觥留連看  
莫放青春冉冉歸

可惜清明雨也晴好春須看水東亭桃花如馬斑斑色  
楊柳藏鴉樹樹青

朱官新生蓋地面辛夷高開滿上頭生憎雨惡兼風惡  
轉益朝愁復暮愁

雨多二月連正月草沒南園與北園一面無情花片片  
百般如怨鳥言言

崑山謠送友人

吳東之州婁東江民廬轟轟如蓬房官車客馬交馳橫  
紅塵軋投康與莊雞鳴關市森開張珠犀翠象列道旁  
吳艤越艦萬首驤大帆雲落如山崩舟工花股百夫雄

蠻音獠語如吃羌水仙祠前海茫茫魚鼈作道虹作梁  
龍堂貝闕當中央靈女緩歌吹笙簧馮夷伐鼓相鏗轟  
或乘飛龍下滄浪大檣小檣火流光翠旗摩雲互低昂  
左驅勾陳右撓搶天子錫命祀南邦重臣下拜靈慈宮  
太平無象躋成康吾州富庶文物昌厥田下下賦下上  
歲貢天府民職恭君子閭閻講虞唐小人業業為工商  
大夫從事舉賢明堂曹僚屬登其良王郎作掾材用長  
理煩剝劇乃不獲自少軒輕有父風穰穰學業盈囷倉

乃翁七十鬚眉蒼二三昆季故昂藏中郎虎髯黠而彊  
誠心懇懇愛其兒願汝忠譽為國楨子孫慈孝百祿將  
願集中正以為裳願以仁義襟為珩願言揖子以為明  
德音秩秩亦孔章

天台行送友人

吾聞天台山一萬八千丈赤霞壁立百雉城閭闔天開  
勢摩盪瓊臺雙闕雲幾重羣山俯伏華頂雄靈仙玄聖  
所窟宅紫氣彷彿飛游龍滄溟直下但如沼青烟東望

蓬萊小火珠光動金銀宮日月跳丸幾昏曉丹崖氣散  
如飛霜草木冬夏涵天香羽人霄蓋擁旌節雨衣雲帶  
雙翱翔石橋飄緲那可度憑雷躡雲天所怒不知方廣  
今有無如何絕却人間路有客有客多好奇方舟明日  
過靈溪青山之谷事幽討手援芝草歌古詩

贈卜香印錢道人

吾聞軒轅師廣成仙成騎龍鼎湖升獨遺弓劍在人世  
白雲冉冉連星辰崆峒洞天三十六日月珠光照龍燭



何年贈汝棗木盤玉宇靈香勸神卜道人十口家一船  
瓦盤沽酒有酒錢桃花洞洞紅滿煙塵流一隔三千年  
送道士游武當

武當諸峰何壯哉大朶小朶青蓮開玄聖中居天地戶  
赤日下照金銀臺神龜六眼電光走山鬼一足雲頭來  
道人再拜望北極應帶滿身星斗回

奉同袁子英東呈楊廉夫先生

楊子十年官不調如此永州文力何洞庭鐵笛龍吹得

天上瓊書鶴寄多  
車子看花將一兩  
雪兒行酒艷雙歌  
時時對客教絃索  
繡領單衫月色羅

和讀李五峰集

先生住婁八十日  
金石遺音手自題  
人物風流擬江左  
文章典雅重淮西  
鳳來山郭時稱瑞  
鯨破滄溟勢欲齊  
著作新文徵士詔  
天光久待照青藜

桂花曲

花開香沓金為粟  
葉密叢叢翠蓋烟  
不分月中惟一樹

要將秋色種諸天

欵乃歌詞

有序

吳興卜者浮舟為家遨遊往來具能道山水之勝請予言其狀如杜之歌夔州禹錫之竹枝也因製欵乃新詞五章遺之言固鄙俚不能當古作者然或遠方懷其風俗使歌之亦足樂也

榻頭船子小如車賣卜遠遊屬當家直到年頭與年尾  
不開看月即看花

芙蓉秋裏繞城開  
溪月溪烟幾番來  
駝橋頭有酒賣  
鷗波亭下棹船回

道場何山山最雄  
弁中形勝聞吳中  
七十二峰茁茁綠  
四月五月楊梅紅

上塘船行無斷頭  
下塘船少好安流  
兩岸青山天上坐  
看山吹笛上杭州

城東城西楊柳多  
女郎不唱本鄉歌  
那箇新傳欸乃歌  
落花風裏奈春何

江南采蓮曲

涉烟采芙蓉湖波蕩秋響天開明鏡入鳥下青菰蔣佳  
人弭輕楫綠水歌兩兩江南有愁思落日空蒼莽

春愁曲

春陽動宮沼花色明闌薄文鶯穿柳過黃蜂粘絮落霓  
裳久不舞叢箒愁未灼寧知色易衰祇念恩如昨

婕妤怨

宮雲冒珠戶漢月下金掌露華生夕氣陰蟲亂秋響紈

扇君不御獨夜秋  
怳怳佳人難再得  
棄捐空懷想

無題和袁子英

雲中錦隊衛旌幢  
帝子乘船思滿江  
不惜鳳絃閒寶瑟  
却教龍女護瑤牕  
淚花筠竹波千頃  
愁雨蒼梧玉一雙  
萬古湘南遺廟在  
至今清怨未能降

瓊宮花發滿神皋  
花下吹笙紫綉袍  
不學鳳臺秦弄玉  
也歌樂府鄭櫻桃  
珊瑚舊夢留春枕  
椒桂新香暖夜醪  
輓輓羊車過別院  
迎看星斗覺心勞

繞帳犀珠星影移銅華鋪首嚙雙螭守宮點臂斑斑血  
結帶同心寸寸絲機上金梭迴艷錦篋中玉子卜靈棋  
飛花解繫相思否莫倩韓家賦柳枝

紫殿長楊滿路塵驪山荒草沒麒麟伶玄作傳進飛燕  
李白歌辭忤太真舞袖夜虛金掌月香囊魂墜紫絲茵  
可憐傾國傾城曲一度秋風一愴神

寄青龍瞿慧夫博士

醉眠亭上追游日為惜高情對物華草巷闌飛花鴨雨

竹沙深映白鷗足叢叢山影侵雲直  
一一人家落路斜  
近報風流多述作門生若箇是侯芭

次陳敬初見寄二首兼懷張仲敏

至正天子明聖君早聞羔雁聘陳羣  
河清地應千年瑞  
星聚天回五色文  
遂有青鸞鳴桂樹也  
憐黃鵠伴沙雲  
詩筒坐得蘇臺使  
百過愁吟到落曛

論交長歎白頭新  
傾蓋相知定幾人  
照世豈無麟閣畫  
買田且卜草堂隣  
南州人物皆零落  
西漢文章尚雅馴



好竹每懷張仲敏  
泠泠風骨水為神

題娑羅室

娑羅樹下幽人室  
山氣因之與秋碧  
古色猶栖竺國雲  
絕頂仰見扶桑日  
太陰垂地風雨會  
百尺撐空鬼神力  
醉呼北海起九原  
為爾重鐫青石壁

書聲齋詩為姚子章賦

幽人一室開風露  
坐想瀛洲玉為署  
把書夜誦秋滿空  
徘徊花影蟾蜍樹  
蓮葉艇子風泠泠  
太乙下照藜火青

笙簧塞耳洗不醒  
溲哉太音誰得聽

綠陰亭為顧晉道賦時與姚子章于彥成歌亭子

上

綠陰亭上夏五月瀛洲上客與俱來  
日出衆鳥繞屋語  
竹深好花當塢開  
鏡裏水涵萍似粟  
席間雲落酒如苔  
更貪賀監清狂甚  
艇子朝朝暮暮回

次西隱寺興上人韻

練折之西西隱寺開殿江波到寺前  
共命鳥飛花似雪

多羅樹濕水生烟寄箋相憶遙憐汝把酒重來動隔年  
猶記別時春色裏滿城蝴蝶落花天

送僧歸江陰山寺

昔葛洪騎  
狼入此山

孰知揚子江頭寺寺門高高樹裏開仙翁已乘白狼去  
古佛或騎青象來春動水流無底谷天晴雲覆散花臺  
山中邑子正憶汝恰得飛空一錫迴

寄陸良貴

堂館綠陰皆面水圖書烏几喜無塵椽櫳交葉纔遮井

菡萏傾花故向人，世事從渠寧分拙。交游于爾覺情親，  
濃蘭沆芷秋風裏。明日南雲別更新。

送趙季文之湖州知事

送子作官山水郡，掾曹日日簿書稀。放生池頭看花去，  
浮玉山前載酒歸。芙蓉入簾秋雨落，穠穠極滿天寒雁飛。  
即聞善政歌賢德，還見清光照紫微。

天馬二首

佛郎獻馬真龍種，六尺之高修倍之。圖畫當今屬周朗。

歌詩傳昔勅奚斯空聞市骨千金直不羨窮荒八駿馳  
有客新來聞此事與君何惜滯明時

四年遠涉流沙道筋骨權竒舊肉駮曉秣龍堆寒感雪  
晚經月窟怒追風漢文千里知曾却曹霸丹青貌不同  
拂拭金鞍被來好幸陪天廐玉花驄

襟詩

靡靡輕薄子沓沓肩相摩營營樊中蠅撲撲火上蛾趨  
利不顧生是非構讒邪所得不既少所喪良已多淒風

遍大野不久當如何

滔滔夏五月桃李春已矣庭前樹扶疎其葉互相倚梧  
桐一高蓋碧氣蔭清美曩曩屋東日連陰密無比當晝  
無穿影西枝覆流水鋪牀終日坐兒女且歡喜有酒輒  
持飲聊樂我云耳貴者日以驕富者日以侈古人云已  
亡誰下白屋士

京畿連大宅新賜公侯第桂樹夾道生臺觀迎風起歌  
塵玉階側棲鳳金牕裏秦娃當妙選趙舞飄輕體大兒

尚書郎小兒叅國議中兒權最隆出入侍天子七葉輕  
漢貂八達哂周士馮唐亦何命白首賤如此

桓王墓

客行古城下下有桓王墓古城多秋草牛羊下來暮

湘絃曲

竹啼非染露山眩乃疑雲靈瑟傳神語休令帝子聞

起夜來

秋生臨水殿月過望仙臺歌吹無聊賴愁吟起夜來

陸定之印為陸仲安賦

陸家漢印吁亦絕金窠籀文盤屈鐵斯人已矣世無傳  
千載得之名不滅何用兵家虎作符空聞澤國龍為節  
勛哉玩物古有言願子文章照前烈

歲盡寄瞿慧夫

瞿子作官無暇日南園臘盡未還家禁春微雪青青草  
照眼疎枝細細花五兩即看飛落日屠蘇應待酌流霞  
詩成無使能將意鳧雁寒雲滿白沙



水閣書事寄鄭明齋

方橋匝匝小如亭山色傾江滄滄青雨裏芭蕉憐畫扇  
花間鸚鵡惜金屏誰傳鴻寶中篇術自寫黃庭外景經  
練水東頭三十里何人識得伍喬星

答昌維清兼柬鄭遂昌葛可久

滄洲解纜不十日相憶題詩寄闔閭常怪接輿歌鳳鳥  
因憐爾雅注蟲魚台州司戶頻相問勾漏仙人好附書  
况汝才華今亦盛五雲坊裏看徵車

擬杜陵秋興八首

露下大江江雁橫窮秋搖落喚愁生波濤百里風連海  
砧杵千家月滿城佩劍衝衝龍匣動巢笙夜夜鳳臺清  
還同使者將秋色一到銀河且濯纓

東過秦皇渡海砮波聲雲影落澗澗君平漫識支機石  
帝子應愁鼓瑟牕鳳穴朝陽鳴好樹槎頭秋水釣空江  
坐來清漏荒城斷愁絕飛蓬老鬢雙

海門八月雨清霜可怪殘雷未肯藏虹蜺斷江將雨映

駕鷲背日與風翔羅合自老黃華宅裴度重來綠野堂  
哀暮閉門懷故舊豈因吹笛滿山陽

巍巍北斗夜闌干盛世無憂行路難轉粟帆檣遼海濶  
舞階干羽獠夷安黃河正道流應復白月空江卧獨看  
願借雙飛珠樹鶴清游一接鳳池翰

灤水秋風曉夜催上京宮殿護蓬萊扶桑日近龍波湧  
閭闔天高象駕迴綵仗齊迎千騎發翠旗遙接五雲來  
揚雄漫有河東賦流落何人一薦材

江上青山接甬東，離離木黍館娃宮。  
芙蓉舊苑長洲裏，麋鹿荒臺落照中。  
銀海雁飛沈夜月，金莖露冷擢秋空。  
可憐蕭瑟江關暮，詞客哀吟思不窮。

金陵佳麗帝王州，今古登臨送客愁。  
玉樹雲連鷓鴣觀，青山日落鳳皇丘。  
荒城併與烟蕪沒，故國空餘漢水流。  
渺渺江湖頻入夢，蕭蕭天地不勝秋。

落日江南發棹歌，楚王宮廟鬱嵯峨。  
雨經巫峽朝雲濕，木落洞庭秋水多。  
璧月銀河空復在，玉簫金管奈愁何。

只今文藻悲遷客何處波濤弔汨羅

春閨曲

綠樹鶯巢遍紅簷燕語頻所思猶遠道何用慰芳春

寄衣曲

蠶歲既已畢鶯時俄復換早製邊上衣秋來愁緒亂

送遠曲

神京佳麗地萬戶復千門看花三月裏慎莫過倡園  
七月發揚子八月過黃河到京書便寄北來鴻雁多

送林尊師

昔謁崑侖華蓋君芙蓉旌旆雨紛紛燭龍銜火朝飛海  
笙鳳乘風夜入雲偷得玉桃如赤日嬾將瓊笈校玄文  
倘其歸去容成洞采拾金鷲幸見分

次鄭明齋柬俞彥莊韻

萱草羅生已滿院篔簹初種欲遮隣廚中雙魚好作鱠  
階下獨鶴長比人久欽陸賈為新語况以荀卿得大醇  
白首相逢在江海紫微終願名絲綸

題沈君錫畫木

君不聞莊椿春秋八十歲又不聞蟠桃一實三千齡不  
知此木歷年幾百萬雲氣上下摩空青羲和馭日海底  
出白銀宮闕搏桑暎嗟哉沈君筆力能扛百斛鼎旋轉  
造化何其神蛟螭走壁白日動列缺御氣流風霆勇如  
陸地盪舟子凜若漢廷折檻臣車行下走九折坂劍化  
躍入延平津大枝輪囷小枝偃千千百百子若孫六月  
赤日天無雲珊瑚水屋常陰陰與君展席坐其下聽我

醉讀南華經

懷張心田

若人清事也無涯客去談詩到日斜  
愛畫龍眠好頭赤  
凌霄不掃落來花

題仙山圖

三峰鼇背起中央繡角塗疎白壁堂  
秦觀東南呈海色  
方壺曉夜發天光  
五芝烟裏游羣鳳  
巨勝華邊卧白羊

闕

宴門雙玉雁憑陵八極俯茫茫



館娃曲

館娃催賜宴西子猶酣酒龍輿下雲旗鳳樂迎王母銀  
橋星似燭翠扇花連牖歡樂殊未終鴉噪城頭柳

堤上行

碧水樓臺三月春蠻兒箇箇唱歌新通海坊中人作市  
靈妃宮裏樂迎神

四月南風海岸深青旗高高樹陰陰三江潮發來如馬  
五兩風搖密似林

高麗女兒珠腕繩玉環穿耳坐船棚絲為帆絳朝朝颺  
銅作琵琶嘖嘖鳴

秋夜曲

玉階月夜千愁色秋水秋波振草涼烏柏風高吹旆旆  
紅葉露冷墜房房

權歌行

春江花柳月水色碧草滋嬋媛競游盤棹歌樂芳時寶  
珥薰麝蘭羽蓋翔鳧鷺臨流激遺響窈窕飄鶯詞竟欲

整輕橈泝洄往從之落日大江平愴然生遠思

白頭吟

皚皚山上雪雪積復還滅皎皎雲間月月圓有時缺周  
公大聖當國時流言况也讒間之結交以面心乃爾白  
頭不若新相知漢家宮闕長門道花發年年怨春草今  
朝寵固色未衰明日怨多恩反少令人輕薄懷古人古  
人轆軻常苦辛蘭陵廢死不歸楚嗚呼此意吾誰陳

棄妾怨

棄妾不足惜，顧顧懷君深。  
奉妾合歡帶，繫君明日心。  
連理樹

堂前好雙樹，枝合葉交遮。  
時有鴛鴦鳥，來銜並蒂花。  
征婦怨

君久戍遠磧，妾愁在空幃。  
不得如青草，隨春上君衣。  
春波曲

妾家紅蕖曲，綠水春滿滿。  
鷓鴣不肯飛，雙棲落花暖。  
柳枝辭

濯濯金明柳年年照妾容  
飛花怨春盡落日度江風

精衛辭

海水深無底百谷流瀾瀾  
精衛銜木石之死心不移  
蓬萊幾清淺會有揚塵時  
眼中怨與海水平鳥飛不惜翅  
羽垂

望夫石

亭亭望夫石化石作心  
丈夫無死節婦人那可輕  
山花滿頭雲作衣日日望  
夫夫不歸夫不歸淚如水  
至今

水流流不止

繫子詞

鄧家兒鄧家兒長繩誰繫高樹枝  
父母各逃生兒死亦  
孔悲弟亡一息不可棄兒雖當棄忍繫之  
鄧家兒哭奚  
為天乎天乎豈無知

次韻寄野航

十日不見華州掾定是清迂在箇邊  
青壁綠雲題石閣  
白沙留月繫湖船娟娟酒落杯香細  
閨閣梅堆雪色鮮

歸來且樂歲年暮何問他儂識太玄

宴呂敬夫水閣

暮春三月之佳日畫裏看花小閣杯一雙  
皓鶴巡池走百葉緋桃映綬開卷幔不知雲亂入  
題詩應怪雨相催  
武陵何處能忘世莫遣閒人取次來

題野航壁

大樹小樹屋東西  
瘦頸鶉鴟來上啼  
明朝牒子坐天上  
野水壓江江月低

呂誠

字敬夫吳之東滄人幼聰敏喜讀書尤長於唐三宗師楷法時東滄之俗尚靡獨能去豪習事文雅故名士咸與之交家有來鶴亭梅雪齋日與郭羲仲陸良貴倡和其間詩意清新不為腐語東滄之人多誦之

七月十五夜對月分韻樓字

東池月滿重開席不減當年庾亮樓每為人生須縱飲



固知物色總難留  
螢光過幔還星散  
雲氣行天似水流  
最憶故人秋滿眼  
山陰何處有行舟

襟詩五首

三月江南渡行春  
屬晚晴留連花下  
觴醜酒待潮生  
開船收雨色新水  
達春江鷓鴣元無  
侶睢鳩自一雙  
青天歸雁喜密樹  
坐鶯深落日春愁  
裏懷人浩蕩心  
城門蹋青草城下  
楊花度荒墉無耕  
人三月翰官賦  
近江喬木裏彊半  
棣花栽葉覆青青  
蔓相沿別樹開

和陳敬初韻呈鐵厓先生

洞庭山中鐵笛君詩家推激總無羣  
星辰鬱鬱豐城劍  
科斗森森孔壁文  
鑿垣久已思顏闔  
載酒應須問子雲  
好向水晶宮闕裏  
讀書結屋坐朝暉

倣李商隱一首

華落銅盤蠟炬融  
逶迤春色照芙蓉  
當筵行酒金釵側  
隔座吹笙繡幕重  
已有鸞刀飛繪縷  
未須翠釜出駝峰  
夜深環珮雲中過  
宛在瑤臺月下逢

登澱山寺

一上湖南澱山寺寺門高開秋樹顛下界雲烟惟一氣  
八方樓閣駐諸天無風靈籟時生壑深夜神龍或起淵  
我獨題詩此臨眺寥寥宇宙幾千年

懷友

夏夜景幽靜齋閣臨前池當檐素月流舉扇涼颼吹參  
差丹棘花婀娜紅蓮枝玉人美無度耿耿勞我思

江水辭送友人之龍江

江水一百里南風一日程飛華多意緒相逐柁樓行  
江水一百里上有蘭與芷采之遺所思含情似江水

采蓮曲和鐵厓先生

刺船水中央櫂船乘晚涼近番灘上過葉裏好鴛鴦  
盈盈藕上花采采墮清淚願將心中絲繫君雙玉佩

蹋鞠篇和鐵厓先生

江南稚女顏色新百花樓前蹋繡輪紅蕖小鞦不動塵  
不動塵放嬌態微風來舞裙帶

芙蓉小踟躕曉風金壁步搖聲  
丁冬綉衫窄窄交斜紅  
交斜紅露玉腕揮紫綿浥香汗

草堂紀事

六月四日登草閣雲薄林深暑氣消  
無賴楚鶯飛箇箇  
不知風雨一朝朝

池上戎葵高一丈白白朱朱復可憐  
近報彩舟來浦口  
頻開金觥向花前

過沙湖賦竹枝詩

白沙湖頭月色新  
白沙湖裏水如銀  
可是吳宮雙玉管  
聽得一聲愁殺人

題萱蝶圖

堂前萱草散滿地  
朶朶幽華也可憐  
絕愛篔簹相映帶  
生憎蛺蝶舞留連

和靖看梅圖

西泠橋下林家墓  
猶有舊時無數花  
孤雲何處雙飛鶴  
落日鷓鴣滿白沙

舟中三首

潮發江門百餘里  
曉過芙蓉湖上頭  
嫋嫋秋風吹櫂柳  
層層雲氣蓋船樓

無數星光燦秋色  
即看露氣薄人衣  
逶迤流吹天頭落  
潑刺驚鳥樹裏飛

天河垂地月光白  
荻岸秋連野水青  
浪靜埜鷗來片片  
櫓搖楓葉下冥冥

渡吳淞江

九月渡江江水落荻花岸岸與秋連沙橋敲側平當樹  
江鶴翻迴巧觸船

送姚子華浙東帥府掾

姚郎辟舉南州掾炳炳才名蚤歲收幕府簡書閒白晝  
戟門旌旆卷高秋花開擬上瀛洲看酒熟頻為鑑曲游  
北來或有雙魚使煩寄新詩寫我憂

草堂雅集卷九